

Dumanda à bocca posta da Mattea LACAVE, Saveriu LUCIANI, ghjacintu VANNI
A NOME DI U GRUPPU "FEMU A CORSICA"

OGETTU : « Pulitica Culturale »

O Sgiò presidente

In a so deliberazione N° 12/132 DI U 26 DI LUGLIU DI U 2012 chì trattava di l'orientazione maiò di u PADDUC, l'Assemblea di Corsica dichjarava chì l'identità è a cultura corsa eranu dui pilastri, à prò di u sviluppu è di l'apertura nantu à u Mondu.

U « fogliu di strada culturale » parlava, inquant'à ellu, di prumove a creazione è a sparghjera di a cultura corsa. Oghje, à chì ne simu ?

Sò crisciuti in pochi anni l'associi convenziunati, da 4 à 27. Segnu forse ch'ellu ci hè un antru sguardu ver di stu Mondu di a Cultura, in cunsunenza cù l'azione forte purtata da a CTC in i duminii di a lingua è di u patrimoniu.

Fattu si stà quantunque chì stu mondu culturale si face sente di manera cullettiva, è palesa i so pensieri in sta fine di u 2013. Iè, in chietudine per dumane è dopudumane, ch'elli sianu associi convenziunati o nò, di pettu à e so prugrammazione, l'incertezza di i finanziamenti, tira avanti è tocca... In fin' di contu, si pò teme oramai di vedene unepochi minacciati di disparizione, o per u più custretti di gestisce altrimenti, à cortu andà, a so azione. S'ellu ùn si parla ancu di calata generalizata di l'aiuti, da a parte di tutte e cullettività, si ponu misurà e conseguenze, per indettu prugrammi ristretti, artisti è intervenenti licenziati, stazii è attelli annullati.

Chì ci dicenu st'associi : per parecchji, ch'elli ùn capiscenu mancu à pena a manera di purtà a pulitica culturale territoriale, ch'elli sianu convenziunati quì dinò o micca. Dicenu dinò ch'elli ci sò ritardi tremendi di pagamentu o sippuru ancu calate. Per un dettu certi associi convenziunati ùn anu micca ricevutu a tutalità di ciò ch'ella avia previstu a convenzione, è senza ch'ella ci fussi a minima spiegazione.

D'altronde, un pruettu cù un cartulare postu in u 2012 per un azzione in principiu di u 2013 vi vene pagatu, s'ella li vò bè, in u 2014. Sti ritardi cagiuneghjanu prublemi ammentati più sopra è chì mettenu in periculu di morte ste strutture. Di l'associi ch'intervenenu in e scole, ùn ne parlemu : si sò visti cambià e mudalità d'attribuzione di u finanziamentu senza essene prevenuti è ecculi chì correnu per limusinà cofinanziamenti da pudè per esse in regula cù u novu funziunamentu.

Compieraghju quì a litania di tuttu ciò ch'ùn vò micca è chì vale dimustrazione : ùn si tratta solu quì di capatoghji finanziarii è di ritardu di pagamentu. Si dumanda una migliurazione significativa di i canali di decisione, d'accelerazione di e struzione di cartulari è di calendariu. Si tratta quì di pulitica culturale.

A dumanda di Femu A Corsica serà dunque in trè :

Chì cuntate di fà per rigulà à u più prestu i prublemi numerosi scontri da l'attori culturali ?

Sariate pruntu à organizà l'assisi di a cultura cum'è l'aviamu dumandatu in principiu di mandatura, è di creà un spaziu ufficiale di scambiu è di pruposta cum'elli esistenu in altrò, induv'elli si chjamanu « cummissione per un spettaculu vivu » ?

Chì cuntate di fà per mette in anda una cuncertazione cù u mondu culturale, da avvià una vera pulitica culturale à prò di a creazione è di a diffusione di a cultura corsa ?